

*Paoro*

# Ko'korosa

*Iyoteparia*

---

## Teepotari

**1** Kúira Koorosa tiopachi mochikame. Nee Paoroa, Riosi e'rarichi Eesusi Riosie Weratiamee weratiamepua, Eesusi wa'api taamowichio iintoria nayewamichio. Pukaepa i'ka iyojura iyotesa aamo uhjurenania, no'o Riosichi pooniwa Timoteo ahjama, <sup>2</sup>yooma aamo Koorosa mochikameo, Riosie Weratiamechi te'te iyorika mochikameo, yooma wa'a Riosichi piipakameopua poponiwa pipiniwaoopua tiame. Teemea yooma aamoopua tiameo, Riosi taamo Noonoopua, tísia kaawe teeretojeranipua amochio, iika yachapari kiamichiopua, ta'iria aamo mochiwari kiamichiopua tiame.

## **Paoro Riosichi nayewa, Eesusichi paparamewichio cheriwema ki'yaka**

<sup>3</sup>Senepi aamo kaawerumawichio itayaipua Riosichio, cheriwema ki'yame teemea taamo Riosio, Riosie Weratiame Noonorao, <sup>4</sup>aamo wa'a Koorosa mochikameo, tísia aamo paparame inamuamekapa, Riosie Weratiamechi Eesusichio. Teemea tiameo cheriwema ki'yamepua Riosio, aamoo tísia nakika mochitoamekopao, Riosichi ahpo ijnuwaka mochitoameopua wa'ao. <sup>5</sup>Wa'a te'teretoame eemea, te'pa tewekachi nuutewa inataka mochitoamekapa, aamowichio enemerikopua, Riosie aamo kiapuameopua nuutewao. Eemea pu'ka nuutewa puuyeka mochitoamepua, pukeri aamo o'ineriachisi Riosi pichiwari tuuyewarichi paparakapao, i'ka Riosi Taanarachi simiyame, aamo tatakoria newipari aamo nayewaretiachi. <sup>6</sup>Ihji wa'api pichiwari kaaweruma tuuyewari amochi tuuyetiamea, ahkasi yomatiam wehjoarichi mehtakamepua, epeche epecheche muuwapari teetoka, Eesusi Riosie Weratiamechi paparasiamoo.

Wa'achitia ikiyame eemeai wa'a aamo mochikachio, Riosi pichiwari tuuyewarichi inamukapao, epeche epecheche muuwepaka Eesusichi paparasiameo, nane'rekapa eemea Riosio, ki nu'uti aamo nakiyai teereriopa, aamo tatakoriaria cheriwemio erapariopa tiameo. <sup>7</sup>I'ka tuuyewari aamo u'yetokamea, Epajarasi iintokamepua, puuu taamo ahjama tekipanakame, taamoeo tísia nakiya. Puuu aamo mochikachi kahtiaio, kiisi se'wika aamo masitekamepua, Riosie Weratiamechi simiyameo. <sup>8</sup>Apoe i'wa enasaopua, yooma taamo tuuyekamepua, aachin teeka aamo mochikao, tísia kaawe aamo nakika mochika.

<sup>9</sup>Pu'ka taamo nane'retewa u'yepatiachisi wa'anao, ki toayame teemea Riosichi itaka aamowichioo, Riosio ahpo Riosiarieo, ahpo e'ra aamo nane'retemichiopua, yooma ihta pahtewari machiwari aamo kiamichiopua, apochi simiyameo. <sup>10</sup>Wa'a tiame amochi iintosoopua Riosio, Riosi nakiyachitia mochitoame enemapua; wa'a nokisikame eemea tiameo, kaaweruma taakeri noonowikame enemapua, Riosi kaawe eratewakamera, yooma ihta machipakamekapapua Riosichi simiyameo. <sup>11</sup>Teemea Riosio itaniamepua tiameo, ahpo te'ta peenia tiame utewarieo, aamo utewatesimichiopua, aamoo pu'sereka te'teretomichiopua, anachasika aamo a'chikoi tiame ikiyaiopua. <sup>12</sup>Teemea taamo Noono tewekachi kahtiaameo, cheriwema ki'yamepua pu'kao, pu'ka itapiti aamowichio katewiamekopua tiame itapiti nuutewao, ahpo ahjama te'ta kaaweruma mochiwarichi mochipuame, te'ta tajayame piiparichi mochiwarichi. <sup>13</sup>Riosia taamo tukapachi mochikoi tatakoriario, taamo puuyanakamepua, ahpo Taana te'ta nakiya ye'karirachi enepatekamepua, <sup>14</sup>ahpo Taanao taamo pejana mukuriopa taamo tatakoriaria cheriwepuawichioo, Riosia te'ta ahsieme taamo piipatekamepua.

### Ihtanako Riosie Weratiamea, Riosi tiiarichi

<sup>15</sup>Riosie Weratiamea, tewekachi taamo Noonokaitepua ki pusie teteiwame. Puuu tewekachi taamo Noonoa, i'ka wehjoarichi eenakamepua, ahpo Taanachitia naawaka. Pukaepa Riosie Weratiamea, ke'chu naayachisi o'inia ahjaka yasitoame tuuyamepua. <sup>16</sup>Wa'a tiachioa yooma ihta tewekachi iintuameopua weechi iintuameopua tiameo, apoe Riosie Weratiame iintoriakaitepua enepatekao, Riosie



*Eesusia, ahpo Noono  
tewekachi tiiarirachi o'inia,  
eenameko tuuna. (1:15)*

Weratiameo apoe taamo Noonoo tewekachi kahtiamakai tiiámekapa, apoe taamo Noonoo ki pusie teteiwame. Apoe wa'api iintokamekaitepua tiameo, yooma ihta teteiwame, yooma ihta ki teteiwame tiaméo, yooma ihta ye'kariwaoi, yooma ihta ya'yawichiwaoi, yooma ihta pa'pamiratuwaoio, yooma pu'kao ahpowichio enejérameo. <sup>17</sup>Hji Riosi Taanara Eesusi tewaniamea, ke'chu kihta ki'tioi ki tetewitiame ahpo Noonochi yasitoniamekaitepapua, Apoe ihsikamepua yooma ihta itapiti iintuame enepatekao, puuu tiameo yooma ahpo enepateriaio, kiisi ikicha iintokamepua kaawerumachio, yooma ahpo enepateriaio te'ta kaawerumachiche teeretomichio. <sup>18</sup>Puuu Eesusi wa'apiapua, yooma apochi paparaka pirenatukameo, ahpo kiisi pusie weerewa tetewiniameka, tiame te'teriane tetewamepua, Apoeo pukachio, mo'oraka teetowachitia tetewiniame. Puuu Eesusi ki pusie weerewarachi pirenatutiamea, Riosi tioparakaitepua, ki pusie tetewiniamera. Apoe Eesusia tiameo, apoe kamera ihsiamepua mukukai eenechi ahjaniamero, ki'tiamepua aaataai wa'asi wa'a tiamea, pukaepa puuu Eesusia, yomatiane ihtaohi ahpo enepateria, te'ta aampa tiamepua. <sup>19</sup>Riosia ahpo te'ta kaawe e'rachi, yomatiane ahpo Riosichitia tiiao, ahpo Taana Eesusichi yasipakamepua. <sup>20</sup>Riosia tiameo yomatiane ahpo tewekachi iinuekaopua, weechi iinuekaopua tiame, ahpo Taanachi taamo ahsieme piipatenarekamepua, taamo ahsieme cho'wekaopua taamo tatakoriaio, taamoo te'ta kaawe te'teremichio apochio. Wa'a tiame iintore Riosia ahpo Taana taamowichio iintoriaeo, taamo tatakoria Riosie kokosapuame, pejanaka kurusichi mukuriaeo.

<sup>21</sup>Eemea pukerio, seesenuka te'tereriaipua Riosichio seepurawarachitia, itapiti ki ka'karuma yooraka ohjoekapao.

<sup>22</sup>Nape ehpeo Riosia, ahpo Taanara aamowichio ahpo weerewachi aiwariaeo, aamoo kaawe te'terepaterepua Riosichio. Wa'a iintokame Riosi Taanaraa amochio, ka'karuma aamo ne'netenariapapua ahpo Noonochio, kihta a'chi tiameopua ohchopario, te'ta piipákame, aaataeoi kihta aamo chaanepo tiiameopua. <sup>23</sup>Nape ahpo Noonochio, wa'a tiame aamo tetewitepuamewichioopua Eesusieo, kiisi se'wika Eesusichi paparaniame nakiyamepua, kiisi toaka yasitomeripua Riosi ka'karuma aamo tuuyewari nayewetiameopua, itapiti Riosie aamo kiapo tuuriache inataka yasitomerimua. Puuu wa'a tiame Riosi cheeriaa, yomatiane wehjoarichi nayewatupo tuutiamepua, Riosi Taanara Eesusieo. Nee Paoroa tiameo, pu'ka nayewatuka ku'ika yasitoamenia.

### **Paoro Riosi tioparawichio tekipanawa, ki pusie teteiwame**

<sup>24</sup>Nee Paoroa, ahkai aamo mochiwachiami Eesusichi simiyame nayewatuka aiwakamekaio, a'chitiaoi aiwaka yasitoainia, ta'iria itipiame neea, puuu Eesusi i'wa weechi oiyame enesaapua pehjo

nayewatukao, i'ka no'o aiwa nayewatuka aiwamii puuua, pu'ka aiwari aiwameri teereria, aiwatoka aiwame neeea, Eesusichi simiyameo. Pu'ka yooraka aiwaka yasitoame neeea, Riosi tioparawichio tekipanaka, pu'kao ki pusie teteiwame, Eesusi weerewara tewaniame. <sup>25</sup>Neeea pu'ka Eesusi weerewarachi te'teriamo, te'ta ma'chiame simiyame masitemichio weratiamenia, Eesusichi simiyameo. <sup>26</sup>I'ka Eesusichi simiyameo Riosia, ehkoriaami o'inia noriwi teewereriaipua pehjo, nape ehpe waanamio Riosia ahpo ijinuwa enepatesiao, ma'chiame tuuyesiamepua pu'kao. <sup>27</sup>Riosia wa'a iintoamepua yooma ahpo piipateria ijinuwachio, te'ta nane'reka mochitomichiopua i'ka te'ta peenia tiame yooma ihta Eesusichi tiameopua, pu'ka taamo Noono Riosio yomatiamie ti'tijoeriwichioopua ahpo tiia ma'chitameo, isaeri ti'tijoeripua ki isaeri ti'tijoeripua tiamé. Puuu Riosi ma'chitaa ihjipua: Eesusi Riosie Weratiame amochi yasitoamepua ahpo Riosiwario, pu'ka tisia peeniatiamie ahpo mochiwarichi mochipuame, aamo inatapatesiamepua. Ihjipua te'ta taamo Noonoo, te'ta ahpo pichiwataa.

<sup>28</sup>Teemea, yooma Riosi na'nayewaturaa, i'ka Riosie Weratiamechi simiyame nayewatusiamepua ti'tijoerio, ahkai mochiwachiami tuuyesikao, kiisi wehchi ipaka tetewimichiopua i'ka tewekachi kahtiamie taamo Noono taamo masitetiao. Teemea i'kao, te'ta peenewari machiwarichi teetoka masitiamie teemea, pu'ka taamo masitiao tisia kaawe pahtepuwichiopua, yooma ihta Eesusichi simiyameo. Teeme pu'ka wa'a tiame masitekao, tisia kaawe te'teremichiopua Riosie Weratiamechio. <sup>29</sup>Pu'kawichio neeea utewaeme tekipanamenia Riosie Weratiamechio, yomatiamie te'ta utewarie no'o teeretotiao.

**2** Neeea no'oo aamo nane'reka mochitojeraninia, aachin teeka tisia utewaeme tekipanakamekopua wa'a kahtiao, aamo Koorosa mochikamewichioo, yooma wa'a Raoriséa mochikamewichioopua tiameo, yooma wahjachi no'o oiyachiamio ki no'o tetewamewichioopua tiameo. <sup>2</sup>Wa'a tiame tekipaname neeea, yooma aamowichioo, aamo iikachi oisa erapamichiopua, napati eeme aamo kaawe nakika mochitoka. Wa'a teetoamenia tiameo, epeche ahsieme aamo pahtiamie enepamichiopua, pu'ka Riosi ki ehpesi o'inia noriwi teereriaepua pehjo, pu'kao yooma Apoe Riosie Weratiamechi simiyameo. <sup>3</sup>Ikachi simiyame te'ta nane'reka mochtosaa eemea, te'ta pahtewari paarasatiamie enemeripua, te'ta peenewari machiwarie nokisika. <sup>4</sup>Neeea i'ka aamo chaaniamenia, i'ka wa'a aamo teeresoo, aataai peenia cheeka aamo wihkuenarioio, ka'chi iika aamo wihkuepuawichiopua. <sup>5</sup>Neeea, ki nooe wa'a kahtiainia, aamo ahjama wa'a kahtiaitenia no'o inatarieo. Peenia e'rame neeea Riosi nakiyachitia te'tereto tuuopa, te'ta pewatiame

mochito tuuopa Riosie Weratiamechio, pukachi ahjachi te'ta paparameko tuuopa.

### **Weemera teerewa mochipuame Riosie Weratiamechi**

<sup>6</sup>Wa'apitia pukeri o'inia aamo Riosie Weratiamechi paparariachitiao, Apoe Eesusi aamo Paamira uuriachitiao, pu'kache e'weka mochitopuapua, pukachiche ahjachi paparatoka. <sup>7</sup>Pukachio eemea teeresi naawaeka mochitopuapua, pewatiame naawaeka Eesusichi aamo paparario, Apoe Eesusi te'ta aamo masiteretiachitia. Eemea aamo Noono tewekachi Riosio, cheriwema ki'yakache mochitopuapua, apoe iintoriopua aamowichio tísia kaawe iintokao, ahpo Taana Eesusichi iintokaopua.

<sup>8</sup>Ka'te aamo toimitia aaata aamo ko'komichioo, aaata aamo ki pichiwaka nayewesoopua Eesusichi simiyameeo, aamo wihkueka nayewenaresoopua. Puuuu oowera i'ka weeechi ti'tijoeri nokiwameche inatamepua, ki ehpesi o'inia wa'a nokiwame. Puuu chaachapaa rooroikame masitewa puuuu, kiisi Riosie Weratiame masitia, uuka chaachapame.

<sup>9</sup>Puuu aaata wa'a chaachapaka aamo wihkuenariamea, ki nane'rekamepua ihji Riosie Weratiame weeechi oikameo, pukachi weerewachi yasitoriamekopua, te'ta tisiwari Riosi tiarirao. <sup>10</sup>Eemea te'ta Riosie Weratiamechi te'teriapao, amochi teerepuame eemea Riosie nehpupari ku'iwario, ka'chi iika aamo wihkuepuawichioopua. Puuu Apoe Riosie Weratiamea, puuu wa'api tisiwarikai tiapaopua, yomatiamé ihta ki ka'karuma tiariopua, aampa te'ta utewari tiiamepua, yomatiamé ki ka'karuma nokiwari noonoraopua, ahpotere tiiamepua pu'kao, yomatiamé aampa tiiamepua yomatiamé pu'ka utewarira tiarirao. <sup>11</sup>Eemea Riosie Weratiameeo, iikachikamera tehpnunetiamépuu, yooma ihta amochi ki ka'karuma te'tereriaio, ki ma'chikamera weerewachi siichitepuwekao. <sup>12</sup>Eemea paantoniao, Riosie Weratiame ahjama mukukameka ijikikamepua, ahjama wetemajitiamechitia; wa'a tiiachio, neerochi o'inia puuyapaio, eenechi ahjakameka ijikikamepua weemera ahjarichi, Eesusi ahjameo. Wa'a ijikikame aamo tetewame Riosia, Riosi te'ta utewarirachi paparakamekapa, ahpo Taana oijenateriae, te'ta ahpo utewarirae. <sup>13</sup>Eemea pukerio, poanachi te'tereriaipua Riosichio, aaata wahjipakamechitia Riosie tetewiwachio, aamo iikachio pehjio eemea, ki Riosie tehpnunetiamépuu pehjio aamo tatakoriario. Nape ehpeo eemea, yooma tehpnunetiamékapuopua ki kaawe aamo te'tereriaio, weemera ahjari kiatiamépuu, yomatiamé aamo cheriwekekaopua aamo ki kaawe noonowirario. <sup>14</sup>Riosia yooma ihta ahpo nuurari taamo wenejiao, yooma wa'asi werapakamepua pu'kao, taamo tatakoriaria wenejiwa wikirieriaopua, kurusichi raositépakaopua

pu'kao, ahpo Taana Eesusi mukiwarieo, ahsieme kajuka netetepakao. <sup>15</sup>Riosie Weratiamea yomatame tamochi ki ka'karuma chaachapaka wenejitiameo, ahsieme kihta nateyame enepaterepua pu'kao, yooma ti'tijoeri tetewachi kurusichi meritameo. Wa'a iintoka Apoe Riosi Taanaraa, pu'ka Satanasi ku'kuiwari taamo na'areka Riosichi wenejika mochtokameopua, tísia suuwe erapatekamepua pu'kao, te'ta newitoka chapisa pe'pereso i'tokaopua, yooma ti'tijoeri tetewáchi suuwe erapateka newitokamechitiao.

### **Ki i'ka wehjoarichi inataka mochtomechitia inataniame**

<sup>16</sup>Pukaepa eemea i'ka wehjoarichi mochtikaiopua pehjo, ka'te aamo toa wenejimichioo, aaata i'ka wehjoarichi iyoriniame nokayameeo, i'ka eee tiame iyoriniamechitiao: ihta kooame iyoriniameoi, ihta itapiti ijirewa iyoriniame, ihta yoorewa teeweniameopua pahkochio, meeche weemerachi simiyame iyoriniameoi, Riosi resipuniame taawechi iyoriniameoi. <sup>17</sup>Yooma puuu itapiti iyoriniamea, kihta nateyamepua Riosichi ka'karuma te'terepuawichioo, se'wi iyoriwakapapua. Te'ta Riosiwichio iyoriniame nateyameraa, ihjipua: Riosi ahpo Taana Weerariakamera iyoriniame. <sup>18</sup>Ka'te aamo toa aamo wenejimichio, Riosi tewekachi ku'kuiwari tísia yoorewari te'terewameeopua, aaata ahpo tísia tesiwa te'terame, e'retiameeopua. Pu'ka wa'a tiame nokiwa inatamea, apoe wa'api ahpo oisataka chaachapamepua, ahpokamera tísia machiyameko erakoka. Yooma puuu wa'a ahpo oisataka masitiamea, kihta Riosi pichiwari tiamepua, teesaio ki Riosi inatá, oowera weechi ti'tijoerichitia inatamepua. <sup>19</sup>Puuua ki nakiyamepua Riosie Weratiameo, ahpo mo'orachitia teetomichioopua, puuua kihta Eesusi weerewara itapitira enepanariamekapapua, te'ta taamo Noono tewekachi kahtame e'rariachitiaopua, ahpo Taanakamera mo'orachitia teetomichioopua, ahpo Taana weerewachi ki pusie teteiwamechiopu.

<sup>20</sup>Nape eemea, Riosie Weratiame ahjama mukukameka ijikikamepua, ki i'ka wehjoarichi mochtikamechitia inatamiapapua wa'asi. Nape wa'a ijikikamekaai eemea, ¿achini iikai eemea wa'api te'teretoamepua eenechio, ke'chu aamo Eesusichi paparoi te'tereriachitiao, aamo ki ka'karuma yooraria yooraka mochtioo? ¿Achini iikai i'ka wehjoarichi nokiwame yoorewatere mochtionariame eemea, i'ka eee tiame nuurari yachatamechitiao: <sup>21</sup>“Ka'te ihchepa pukachio, ka'te ko'ka pu'kao, ka'te ahjae ihsi pu'kao”? <sup>22</sup>Yooma puuu nuurari ka'tetaniamea, i'ka wehjoarichi mochtikameche nuurari iyoriniame puuua, puuua Riosichi kaawe te'terepuawichioo, kihta nateyame puuua. Puuu i'ka wehjoarichi nuurari yachatame wa'inewa iyoriniamea, kajumiite puuua wa'asi, taamoo tewekachi Riosi

ahjama mochipatetiopaopua. <sup>23</sup>Puuu i'ka wehjoarichi itapiti iyoriwa nokayamea, tísia Riosichi iyoriameka nokayamepua, tísia ahpo weerewachi kokosa yooramekapaopua, te'ta Riosichi iyoriame ahpo eratekaopua ti'tijoerio. Nape puuu weerewachi ahpo kokosaniamea, kiisi taamo ku'yamepua ki ka'karuma nokipuawichioo, itapiti ki ka'karuma nokiwa weemuniamiepua.

**3** Eemea Riosie Weratiamechi paparakapaopua, weemera ahjarichi oijenakameka iikamepua Eesusi Riosie Weratiame ahjamao, Eesusi mukukoi eenechi oijenatetioiopua. Pukaepa eemea wa'a ijikikamekapao, aamo tewekachi mochikameka erakópuapua wa'asi, Riosie Weratiame yawichituachi ahjama mochikameka erakoka, Eesusi ahpo Noono yawichiturachi kahtiachi, ahjamina ahjama ya'yawichituka. <sup>2</sup>Pu'kache epeche te'ta nateyamechi inataka mochitopuapua, tewekachi mochipuameche, ki i'ka weechi aamo mochikamechitia erakoka. <sup>3</sup>Eemea ehpeo, i'ka wehjoarichi iintuame aamo ki ka'karuma weemuka mochitoriao, mukukameka ikikame puuupa amochio, weemera ahjarikamera uukamekapa eemea, Riosie aamo kiatiamekamera, Riosie Weratiamechi paparakamekapapua. <sup>4</sup>Riosie Weratiamea pu'ka weemera ahjari taamo ki'yakamepua, pukae taamo ahpo tísia peeniatiamie mochiwarichi mochime te'teriamie enemichiopua, eenechi enasaopua taamo apechunamiao, ahpo ahjama mochiwamiachiopua.

### **Ke'chu Eesusichi paparai te'teretotiamie; Eesusichi paparaka te'teretoniamie tiame**

<sup>5</sup>Pukaepa eemea i'wa wehjoarichi mochikaiopua pehjo, yooma toipuapua wa'asio, mukukamechitia tetewipuapua pu'kao, yooma pu'ka ki Eesusichi paparaniame nokiwameopua, i'ka eee tiaméchitia: ihtaoi suwepori nokiwame, ki ka'karuma ikotuwa nokiwame, aaata iinuekopao wa'achi teerenarewa, ihtaoi itapitichi riosiwataniameoi. <sup>6</sup>Yooma aaata i'kaka tiame ki kaawe nokayamea, Riosi nekarewae kokosapuamepua, kiisi e'weka mochitoamekapapua, tewekachi kahtiameopua Riosio. <sup>7</sup>Eemeai wa'achi nokaka mochiriaipua, ke'chu taamo Paamira Eesusichi paparaio. <sup>8</sup>Nape ehpeo eemea, ki oosa wa'a nokaka mochitopuapua, i'ka eee nokiwamechitiao: aaata tísia nekakapa merinarewa, aaata na'ara yorapuaichio na'ara ihsiwa, na'ara chaachapawa aaata na'arepuawichio, iinyatiame suwepori nayewaniame. <sup>9</sup>Ehpeo eemea ka'te aamo ahpo wistuka mochitomitiapua, yooma toakamekapa eemeapao, aamo ki ka'karuma nokariaopa, ke'chu Riosie Weratiamechi aamo paparai nokariameo. <sup>10</sup>Ehpeo eemea Riosieo, weemera ti'tijoe enepakamepua, ooweru tiameo, wa'achitia. Amochio

eemea senepi epecheche teetopamepua yooma ihta Riosichi simiyame machiwari, Riosi tiameka teerepakamekapapua amochio, weemera te'terewachio. <sup>11</sup> Wa'a tiame iintokame Riosia aataoi tamochio, yooma Eesusichi paparamechiopua, pe'yachi ki i'isaeri ti'tjoerikoio, pe'yachioi siichitepuwatiamekooi ki siichitepuwatiamekoiopua, pe'yachioi aata Siintiani weeechi ti'tjoerikooi, pe'yachi simaroni ti'tjoerikooiopua, pe'yachi teekoemekooi ki teekoemekooiopua. Te'ta nateyameraa, Eesusi Riosie Weratiame yomatiam wehjoarichi mochikame iintoriakamerawichio puuua; puuua yooma aata ti'tjoerichi apochi paparakamechio, pukachi yasonariame eneriam puuua, ahpo Riosiarieo.

<sup>12</sup> Riosia aata ahpo Taana Eesusichi paparakameo, ahpo ijinuwa iintapakamepua, tísia nakiyamekapapua aamoo. Pukaepa eemea amochio, ka'karumache tiame tetewitetopuapua, eee tiamechitia: aamo ahpo tesiwe erakoniam, kaawe e'raka ihkokeniam, kihta aamo weruma uuniam teerewa, ki e'raka cheeka nayewaniame, ki aata nahsinapaniam. <sup>13</sup> Aamo ahpo anachiam enepuapua; aatae aamo wenejitiaeo, cheriwepuapua pu'kao. Eemea taamo Paamira Eesusi aamo cheriwieriachitia, wa'achitia aamo ahpo cheriweka mochitopuapua. <sup>14</sup> Te'ta nateyameraa amochio, te'ta kaawe aamo nakika mochitoniamerapua. Te'ta aamo nakika mochitosaa eemea, te'ta kaawe nokaka mochitomeri eemea amochio, taamo nakika mochitoniamekopapua, taamo piiripi pirenaturi iintapakamepua, Riosie Weratiame weerewarachiopua, Riosie Weratiame weerewara ki pusie teteiwamechio. <sup>15</sup> Ta'iria mochitopuapua aamo iikachio, kaawe aamo te'terio erakokaopua, taamo Noono tewekachi kahtiamchio, pu'kawichio apochi aamo paajutekame Riosia, piiripichitia enepamichiopua, ahpo Taana Eesusi weerewachio, ahpo Taana Eesusi weerewara ki pusie teteiwamechio. Riosi amochi iintoriao, kaawe e'rekache mochitopuapua, eepi cheriwema ki'yakache, aamo ahpooiopua tiameo, cheriwema kiapuapua aataeoi aamo kaawe yoratiao.

<sup>16</sup> Eemea amochio, amochi pochikameche te'terepuapua Riosie Weratiamee aamo masiteretiao. Aamo nanapawiachi napawisaapua Riosi iyorimiao, Riosie Weratiame te'ta machiwari masiteriachiche teetowa masitepuapua. Ahkai aamo nanapawiamio, ihtaai Riosi nayewame wikatapuapua, yoomahka pirena kaawe chaachapaniam Riosio, pirena aamo iikachi kaawe erakoka, cheriwema ki'yaka Riosio. <sup>17</sup> Ihtaai aamo chaachapaopua, ihtaai aamo nokayaoipua tiameo, aamo Paamira Eesusichi te'ta aamo te'teria inataka nokisipuapua, ahkai aamo nokisiamio. Ka'te natakepamitia eemea tiameo, aamo cheriwema kiamia Riosichio, Eesusi te'ta kaawe iintoriawichio aamowichio.



### Ta'pechi mochikamewichio tuuyewari

<sup>18</sup>Eeme kukunara ujujiraa, aamo kukunawa neesetowatere te'teretopuapua. Wa'a te'tereka mochitojereniame Eesusi Apoe Paamiraa, ooweru apochi paparameopua. <sup>19</sup>Eeme ujujira kukunaraai, kaawe nakika mochitopuapua aamo uupio. Ka'te e'raka ihsiwa ihsimitiapua aamo uupichio. <sup>20</sup>Eeme kukuchiwaraa, ka'te toaka mochimitiapua aamo yayawa e'wewao, wa'a aamo te'terejeramekopua Apoe aamo Paamira Eesusia. <sup>21</sup>Eeme yayawaai, ka'te ki taisa erapatemitiapua aamo tatanao, tísia nekaweka tuuyewaeopua pu'kao, utewaeme e'raka yoorawa chaanewaeo. <sup>22</sup>Eeme ahpo teeko seekaraka teeka mochitoameai, kaawe e'waka mochitopuapua aamo teekoo. Nape pichiwarie e'weka mochitopuapua pu'kao, taamo Paamira Eesusio aamo kaawe nokayame e'remichiopua aamo wa'a te'teretoopaopua. Eemea wa'a te'teremeripua, ki aamo teekoe tetewiniaopua. <sup>23</sup>Yooma eeme Eesusichi paparamea, yooma ihta aamo yoorapua tiameo, kaawe e'raka kaawe yorapuapua, aamo Paamira Eesusiwichioo, kaawe e'raka yorakiamechitia. <sup>24</sup>Wa'a erakoka mochitomete eemea, aamoo Riosio itapiti aamowichio nuutia kiamerikopapua. Pukaepa yooma ihta aataawichio aamo yooraiopua, Eesusi Riosie Weratiamewichio yoraniameko erakopuapua, puuu Eesusikamerakopua te'ta aamo Teekorao. <sup>25</sup>Nape aata ki kaawe nokakamea, ahpo ki kaawe nokariawichioo, kokosari aiwatepuamepua Riosieo, ki aata epeche weruma tiame tetewamekopua.

**4** Eeme tetekoraai, kaawe uuka mochitopuapua aamo seekarewachitia mochitiao. Ka'karuma eenepuapua pu'ka ahjamao, kaawe e'erakoka kiapuapua pu'kao, yooma itapitio ihtaio nakiyao, nane'reka mochitoamekapa eemea, te'ta aamo Teekoo, te'pa tewekachi kahtiamekoopua.

<sup>2</sup>Eeme Eesusichi paparamea, senepitia Riosi nayeweka mochitopuapua. Ihtawichiooi nayewiaopua Riosio, aamo e'ra nayewepuapua pu'kao, ki ni'oka nayewepuapua Riosio. Riosio eemea, ka'te natakepamitia aamo cheriwema kiamiao.

<sup>3</sup>Riosio itanepuapua taamowichio, kaaweruma tiame tamochi teetomichiopua, wahjachi mochiwachiami taamo masitemichioo, ahpo kaaweruma tuuyewari taamo ki'yaria taamo nayewatumichio. Ihji Riosi Taanarachi simiyame no'o nayewatuaa, Riosi noriwi teereriapua, ehpiamio taamoeo, yomachiami mochiwachiami ma'chitapuawichioopua. Neeea pukachi simiyame nayewatuamekapao, i'wa peereso yachatiamenia.

<sup>4</sup>Riosichio no'o ku'iwa itaka mochitopuapua tiameo, no'o ahpo kaaweruma tuuyewario, ma'chiamie no'o masitemichiopua,

ahkai mochiwachiami no'o masitesiachio, yooma ihta Riosie Weratiamechi simiyame no'o nayewatuachio, te'ta Riosi no'o yorajerachitiaopua.

<sup>5</sup>Eemea Riosie Weratiamechi simiyame masitiaiopua, aata ki Eesusichi paparakameopua pehio, kaawe peeneka nayewepuapua pu'kao, kaawe e'reweka teeka masiteka, kihta kokosa erapuaichioopua aatachio, aata masiteme tiioo, ka'te wa'atia u'matotemitiapua.

<sup>6</sup>Muuua aata nayewiaio, kaawe e'raka nayewepuapua pu'kao, kaawe e'raka itipimichioopua pu'kao; itapiti aamo iinatukesoo, peeneka nehjiapuapua pu'kao.

### Kajurachi teepotari

<sup>7</sup>Wa'a aamo uhjurenane aata tijoe Tikiko tewaniame, apoe aamo tuuyemichioopua te'ta achini teeka taamo mochika i'wao, aachin teeka taamo simitia Riosichi tehkio. Puuuu Riosi tehkiwachio, tísia kaawe taamo ku'ikamepua, pukaepa teemea pu'kao Riosichio, taamo poonichitia tetewamepua. <sup>8</sup>I'ka Tikiko wa'a aamo uhjurekania aamo tuuyemichioo, aachin teereka taamo mochikao, aamo taamo nane'resaapa wa'ao, kaawe erakomichioopua. <sup>9</sup>Wa'a uhjuramenia tiame Tikiko ahjamao, Oonesimo tewaniame. Puuuu, wa'a aamo mochiwachi ohjoemepua, taamoo pu'kao, Riosichi poonichitia tetewa, puuu ooka chaachapamapua aachin teeka taamo mochikaoopua i'wao.

<sup>10</sup>Arihtako tewaniameai no'o ahjama peereso kahtiamea, aamo teepotenapua tiame. Marako tewaniame tiameai, aamo teepotenapua, puuuu Wenawe pa'chira taanara. Nane'riame eemeapa aachin teeka no'o tetewamekopua Marakoo; wa'amahka aamo mochikachi enasooopua piie taawechiami ahkai, kaawe uuka tetewipuapua pu'kao. <sup>11</sup>Eesusi Uhto teewataniameai, aamo teepotenapua tiame. Ihjichepua paika i'isaeri Eesusichi paparakamea, no'o ahjama tekipanamea Riosiwichioo, ti'tijoeri paajutekao Riosi ye'karichi e'enamichioo. Ihji paikaa, no'o tísia yuuwesioio, no'o kaawe erapateka mochtokamepua. <sup>12</sup>Aamo teepotena tiame Epajarasi tewaniame, aamo ohjoekachi o'inia eenakame tiame. Ihjiai Eesusi Riosie Weratiamewichioo, tísia tekipanaka yasitoamepua. Ihjia aamowichioo, tísia itaka yasitoamepua Riosichio, aamooopua Riosichio, epeche kaawe te'teretoka mochtomichioopua, yooma ihta Riosi te'ta nakiyachitia, yooma wahjachi aamo yorakeka mochtowachio. <sup>13</sup>Epajarasio nooe wa'api tetewakamepua pu'kao, tísia utewaeme tekipanaka yasitokamekopua aamowichioo, Raoriséa mochtamewichioopua tiameo, Eerapori mochtamewichioopua wa'achi. <sup>14</sup>Ruuka merikoai tísia kaawe nakiwamea, piirechi tijoe Reema tewaniameapua tiame, na'pahka aamo teepotenapua wa'achi, yooma aamoo.

<sup>15</sup>Eemea no'o teepotekemitiapua, Riosichi poponiwa pipiniwa tiame Raoriséa tiopachi nanapawiamé. Niinja tewaniame oowitiameopua, no'o teepotekepuapua tiame wa'achitia, yooma Riosichi paparamé, ahpo ta'perachi naanapawitiame. <sup>16</sup>Eemea yooma i'ka iyojura chiia iyonaka nane'resaopua, Raoriséa tiopachi mochikame i'yetopuapua i'kao, Raoriséa tiopachi mochikame iyonamichiopua tiameo, i'ka no'o iyojurao. Wa'a i'yetosapa i'ka no'o iyojurao, Raoriséa no'o uhjureria iyojura Koorosa tiopachi upapuapua, wa'a Koorosa tiopachi iyonapuawichiopua tiameo. <sup>17</sup>Aakipo tewaniameo chaanepuapua eee chanikao: “Ahseparika kaawe teetopuapua, aamo Paamira Eesusi ki'yaria tehkichio, ahpowichio aamo yoramichio ki'yariachio.”

<sup>18</sup>Nee Paoroa, nooe sekae iyoteka chiiamenia i'ka no'o aamo chaaniao: Ka'te no'o natakepamitia eemea Riosichi itamiao, no'o i'wa peereso kahtioio, kaawe no'o neesetoka yasitomichioo. Neeea i'ka aamowichio iyotewachiopua wa'asio, taamo Noono tewekachi kahtiameo, aamo tísia kaawe ikiniame ikijerania. Wa'a ikisaa kaawe enemapua. Cheriwema wa'asi.




Illustration by Alice Paschal

*Paoroa apoe iyotena, ahpo  
wa'api sekae. (4:7)*